



SIARAN MEDIA
KPWKM SEDIAKAN GARIS PANDUAN PENGENDALIAN KES KEGANASAN
RUMAH TANGGA

PUTRAJAYA, 9 DISEMBER – Buku Garis Panduan Pengendalian Kes Rumah Tangga telah disediakan oleh Kementerian Pembangunan Wanita, Keluarga dan Masyarakat (KPWKM) kepada 9 buah agensi teknikal bersempena pelancaran Kempen 90 Hari Menangani Keganasan Terhadap Wanita 2015 pada 1 Oktober 2015 di Dewan Auditorium Cempaka Sari, Perbadanan Putrajaya. Majlis pelancaran tersebut telah disempurnakan oleh Menteri Pembangunan Wanita, Keluarga dan Masyarakat, Dato' Sri Rohani Abdul Karim.

Buku tersebut disediakan bagi membolehkan semua maklumat mengenai peranan, tanggungjawab dan prosedur yang diguna pakai oleh agensi terlibat didokumenkan sebagai sumber rujukan. Garis panduan ini juga bertujuan untuk mengelakkan pertindihan tugas dan fungsi antara satu agensi dengan agensi lain yang terlibat dalam pengendalian kes keganasan rumah tangga.

Sesi Konsultasi “*Multi-Stake Holders Meeting*” mengenai Pengendalian Kes Keganasan Rumah Tangga yang diadakan pada hari ini merupakan inisiatif dan komitmen kerajaan bersama Pertubuhan Pertolongan Wanita (WAO) serta 9 agensi yang terlibat untuk duduk bersama memperkasakan hubungan dan kerjasama berdasarkan prosedur pengendalian kes mengikut Garis Panduan Pengendalian Kes Keganasan Rumah Tangga yang telah disediakan. Kesefahaman dan kerjasama yang baik antara agensi pelaksana sangat penting memandangkan pengendalian kes keganasan rumah tangga melibatkan komitmen padu semua agensi yang terlibat.

Kerajaan sangat komited untuk menangani kes-kes penderaan, penganiayaan dan sebarang perlakuan yang melibatkan keganasan rumah tangga. Ini termasuklah penggubalan Akta Keganasan Rumah Tangga 1994 pada tahun 2012 yang turut melibatkan penderaan emosi, penderaan mental dan psikologi, penggunaan bahan yang memabukkan dan penggunaan bahan yang menyebabkan delusi kepada mangsa dan mangsa kanak-kanak.

KPWKM telah menyediakan kemudahan perkhidmatan Talian Kasih 15999 yang beroperasi selama 24 jam bagi aduan kes-kes krisis yang berlaku dalam masyarakat seperti penderaan, pembuangan bayi, kaunseling dan lain-lain.

Disediakan oleh:
Bahagian Dasar,
Kementerian Pembangunan Wanita, Keluarga dan Masyarakat.